

## Xroon sa ó tsikjin ndo Pablo xruen en ndo ndo Timoteo

### *Ndo Pablo kjin en ndo ndo Timoteo*

<sup>1</sup> Jan an, Pablo, nta a xrée Ncháina Jesucristo ixi jaña tjaun ndo Dio, ndo tajon juachaxin tsechón chujni kain nchakon, ko ndo Jesucristo, ndo chon enna tsii íjngo.

<sup>2</sup>\*Ja a Timoteo kjin an xroon ji i ko xruan an jua-jna, ja a chjan na, xjan nduaxin chuntia\* Ndotáina Dio ko Ncháina Cristo Jesús. Je e ndo tsikonóa a ndo ko sintanchaoan ndo ko xrotjáa ndo juaxruxin.

### *Tsii chujni ndako a tsjako chijnie ndo Dio*

<sup>3</sup> Xranchi kuinóatána ngajian nchakon sakjuí tjajna Macedonia, ja a titu a tjajna Éfeso ixi tsetuen en kaxin ni ste nti a, ni ndako a tjako chijnie ndo Dio, ítsjako a nã jaña,

<sup>4</sup> ko tetuen en nã tsitikaon a nã chijni xro an xrée, chijnie ni bake e sa ó. Chijni me e je o ncheke tō nã ko tjakaxin kichuu nã ko xro an xrée chijni me e, ixi kain me e tingijna i tsichuxin nã nge e tjaun ndo Dio ixi je e ndo tjaun ndo ícha xrochúntiani ngajin ndo.

<sup>5</sup> Jan an tetuan an ji i ixi kain sen ícha xrotjue e kichuu sen ixi ti xrotjue e kichuu sen me e ícha tsontjúá aséen sen ko ti jian xraxaon sen ko me e tsjako ixi nduaxin chuntia sen Ncháina Jesús.

---

1:2 Hch. 16:1. \* 1:2 **chuntia** tener fe

<sup>6</sup> Ko ikaxin sen tjáñe e sen ixi xrotjue e kichuu sen, je o tjakaxin sen ko ji i tingijna i sen.

<sup>7</sup> Je o tjaun sen xrokjan sen xranchi ni tjako ley ko tienxin a sen me e, ko tienxin sen nge e tjako sen xranchi xrokjui chijni jian.

<sup>8</sup> Ko jaina nojna ixi nge e kuetuan an ndo Dio me e jian, siá jaina nduaxin sinchekuen enna chujni xranchi tjaun je e ndo.

<sup>9</sup> Ó nojna ixi ley kuetuan an Ncháina, je a jii kondeexin ni jian nche e. Ley kuetuan an ndo Dio jii ley kondeexin ni ña i ko ni titikaon a, ni yama ijie, ni nichjangí e ndo Dio ko ni titikaon a ti nichja ndo ko ni naatóñaxón ndotée ko janée ko ikaxin chujni,

<sup>10</sup> ko kaxon ni chóna inaa chujni je a janchri e ko je a ndoxi e, ko xi tejuakao xi, ko nchri tejuakao nchri, ni tee ko ni nchekji chujni, ko ni ncheya, ko ni nichjaxin ndo Dio ixi je e na nche e na ti jian ko nduaxin a me e. Méxin ley kuetuan an ndo Dio jii ley ixi tsingijna kain ni titikaon a chijni jian.

<sup>11</sup> Ixi ji i chijni nduaxin ko jian tajon juachaxin tsechón chujni, ko ji i ti kuetuanna ndo Dio, ndo tjúá, tsjako anta.

### *Nge e jian juinche e ndo Dio ngajin ndo Pablo*

<sup>12</sup> Tajon juasiana ngajin Ncháina Jesucristo ixi juinchesojina ndo ko bikon ndo ixi jian titika on ndo, me e chjána ndo ixra sinta a ngajin ndo.

<sup>13</sup> \*Maski seno kuanichjangí a ndo ko baktikaon a ndo ko bakengi sen titikaon ndo ko chinga banichja kondee je e ndo, ko maski jaña junta a, ndo Dio tsango bikonóa na ndo ixi

nchakon me e nóna i nge e junta a ko kuichuxin a ndo.

<sup>14</sup> Ko Ncháina Jesús tsango juinchenchaonna ndo ixi kuajon ndo juachaxin tsitika on ndo, ko jaña chuntia ngajin ndo ko tjua a† sen kichuuna ixi titika on ndo.

<sup>15</sup> Ji i ti nduaxin ko xrokonda ixi kaina tsitikaonna ixi ndo Jesucristo kuii ndo ngata a nunte ixi tsantsje ndo ijię chóna kain chujni. Ko jan an ícha ndako a junta a.

<sup>16</sup> Ko maski jaña junta a, ndo Dio ícha bikonóa na ndo ixi jaña juakoxin Ncháina Jesucristo ixi je e ndo tsango jian ndo ko kuindoxinna ndo me e jan an juakoxin ngajin kain chujni ixi sen tsitikaon ndo xrochóna sen juachaxin tsehón sen kain nchakon.

<sup>17</sup> Méxin xrokonda tsajonna kain juasiaina ngajin ndo Rey tsake e kain nchakon, ndo nai a tsen en ko chujni jua i tsikon na ndo. Ko je o je e ndo Dio tituan an ndo, ndo tsango no e kain nge e. Jaña tson en.

<sup>18</sup> Timoteo, ja a chjan na, ko tetuan an ixi tsjacha tsetua ngajin ni ndako a tjako chijni ixi chuntia Ncháina ko jian xraxaoan. Ko ja a sinche e ti jian xranchi nichja sen kichuuna nchakon kuaye é xrée Ncháina, sen nichjaxin ixi juachaxien ndo Dio.

<sup>19</sup> Ixi kaxin sen ndako a xraxaon sen, méxin juinchetjáña sen ti jian baktikaon sen Ncháina.

<sup>20</sup> Jaña kon en xi Himeneo ko xi Alejandro, méxin jan an kuajon xa ngajin Xixron anxrée ixi

---

† **1:14 tjua a** yo te amo

tsikaa jaa xa ko tsono e xa ixi jua i xronich-jangí eni ndo Dio.

## 2

### *Xranchi xronichje ena ndo Dio*

<sup>1</sup> Titikaonnta nge e tetuan annta ixi xronichje enta ndo Dio, ko tinóatáanta ngajin ndo, ko tájonnta juasianta ngajin ndo ixi chao tsintee kain chujni.

<sup>2</sup> Xrokonda tsjanche enta ndo Dio ixi tsingijna ndo kain ni tetuan an ixi jaña ícha jian tsojuna, me e tsinteketo a chujni ko tsitikaonna ndo Dio ko jian sinche ena.

<sup>3</sup> Kain ji i jian ixi jaña tjaun ndo Dio, ndo tajon juachaxin tsehónna kain nchakon.

<sup>4</sup> Ixi je e ndo tjaun ndo tsehón kain chujni kain nchakon ko tjaun ndo ixi tsono e n̄a chijnie ndo, chijni nduaxin.

<sup>5</sup> Naakua ndo Dio jii ko naakua ngisen nichjaxin chujni ngajin ndo Dio, me e ndo Jesucristo, ndo konoxin xranchi chujni ngata a nunte xasintajni.

<sup>6</sup> Je e Ncháina Jesucristo kuajon ndo aséen ndo ko kuen en ndo, me e jaña juenga ndo n̄a jíee chujni. Ji i kon en xranchi ti tsindachro ndo Dio.

<sup>7</sup> \*Ndo Dio tjaun ndo tsono e chujni kain ji i, méxin kuiya na ndo ko kuayá a ixra sintano a chujni, ni je a judío, ixi tsitikaon n̄a Ncháina Jesucristo, ko tsono e n̄a nge e ti nduaxin. Ko jan an ti nduaxin nichja ixi titika on ndo Cristo.

<sup>8</sup> Tja on ixi kain sen xi xronichje e sen ndo Dio ngixe i ti no ste sen, ko tsjatsi in itja sen ixi tjúá

aséen sen, ko tsjakaxin a kichuu sen, ni tsoñao a kichuu sen.

<sup>9</sup> \*Ko tja on ixi kain nchri ndako tsintetsáa nchra ko tsake a nchra manta ntarichi ti ícha sinchexroan ni xi, ko tsite a jaa nchra ixi tsikonni tsango tsoxruinta kui te jaa nchra, ko tsake a nchra ntachika oro o ixro tjintee.

<sup>10</sup> Jaña sinche e sen nchra ti jian xranchi tikinixin nche e kain nchri tajon juasie ngajin ndo Dio.

<sup>11</sup> Ko nchakon tsin en sen nchri chijnie ndo Dio xrotenko sen ko tsitikaon sen kain nge e.

<sup>12</sup> Ko tajon a jan an juachaxin ixi sen nchri xronichja sen ti jii kueya chujni ko je e sen tsetuan a sen ngajin ndoxi e sen ko xrokonda xrotenko sen,

<sup>13</sup> ixi ndo Dio sa ó juinchéña ndo ndo Adán ko tjume e jan Eva.

<sup>14</sup> Ko je a ndo Adán kuitikaon ndo juancheya tsindachro Xixron anxrée. Je e jan Eva kuitikaon jan nge e nichja Xixron anxrée, me e kuama jan ijie.

<sup>15</sup> Ko nchri xro an tson en nchra siá sinchejongí e nchra chjen en nchra ko sinchekangi nchra xjan, ko siá tsitikaon nchra ndo Dio ko siá xrochuntia nchra ndo ko xrotjue e nchra ndo ko jian xroxraxaon nchra.

### 3

*Xrokonda jian sinche e sen tjaun tsituan an ni ngo*

<sup>1</sup> Nduaxin ji i: siá xrojan ngisen tjaun ícha tsituan an sen ni ngo, jian ixra tjaun sen.

<sup>2</sup> \*Méxin ngisen tjaun sinche e ixra ji i ko ícha tsituan an sen, xrokonda jian tsake e sen, jaña xro an chujni xronichjangí e sen ko tsjankata i na sen xrojan ijie, ko kaxon xrochóna sen naakua janchri e sen, ko jian xroxraxaon sen nge e sinche e sen, jaña chujni jian xronichja na ixi je e sen, ko jian xronichje e sen ni tsiji ndo a sen, ko jian tsono e sen nge e sinchekuen en sen chujni.

<sup>3</sup> Ko xrokonda xrokuan i sen ko tsetokao a sen chujni. Xrokonda tsingijna sen chujni ko jian xronichje e sen chujni ko xrotjue a sen tomi.

<sup>4</sup> Ko jian tsetuen en sen ndo a sen ko tsetuen en sen chjen en sen ixi tsitikaon xjan ko xrochóna xjan juasaya.

<sup>5</sup> Ixi ngisen noe a tituan an ndo a, ¿xranchi tsituen en sen sen ningue ndo Dio?

<sup>6</sup> Ko ngisen tjaun sinche e ixra ji i, je a naa sen nandá kuaxi kuitikaon ndo Dio, ixi ngisen nandá titikaon ndo ba sinchejié aséen sen ko tsama sen ijie xranchi kon en Xixron anxrée.

<sup>7</sup> Kaxon xrokonda jian sinche e sen ixi jaña chujni chúxin a chijnie ndo Dio jian xronichja na ixi je e sen, ko jaña sinche a sen ti ndako a tjaun Xixron anxrée.

*Xranchi sinche e sen chóna ixra diácono ngaxin in ni ngo*

<sup>8</sup> Kaxon sen kuayé e ixra diácono, xrokonda jian xronichja na ixi je e sen, ko xrokonda nduaxin

sinche e sen ti ndachro sen, ko xrokuan i sen, ko tsayé a sen tomi ixi tson en naa ixra ndako a.

<sup>9</sup> Jaña kaxon chijni jian kuayé e sen xrokonda jian tsitikaon sen ko jian xroxraxaon sen.

<sup>10</sup> Sen tjaun sinche e ixra diácono sa ó tsatsinga kaxin nchakon tsjakoxin sen ixi nduaxin jian titikaon sen, ko tjume e chao sinche e sen ixra me e.

<sup>11</sup> Jaña kaxon sen nchri xrokonda jian xronichja na ixi je e sen ko xronichja i sen ti juancheya ko ti ndachro sen xrokonda nduaxin sinche e sen.

<sup>12</sup> Sen diácono je o naa janchri e sen xrochóna sen ko jian tsetuen en sen chjen en sen ko sen ndo a sen.

<sup>13</sup> Ixi sen jian sinche e ixra, chujni xrochónde e na sen juasaya ko tsosue a sen xronichja sen xranchi kuaxi kuitikaon sen Ncháina Jesucristo.

### *Chijni nduaxin titika onna*

<sup>14</sup> Maski tja on tuinxin tsjasotsja a, jai kjin an xroon ji i

<sup>15</sup> ixi siá tsonchrjenna, ja a tsono a xranchi sinche e ixra ngajin sen kichuuna, sen tikinixin en ndo a ndo Dio, ndo jichón. Sen ni ngo xrokonda jian tsitikaon sen chijni nduaxin.

<sup>16</sup> Ko ti chijni nduaxin kuaye ena me e chijni ícha tjintee ko chujni kuachúxin a na chijni ji i ko nduaxin nge e titika onna:

Ndo Jesucristo jongí e ndo nti i nunte xasintajni\*  
xranchi naa chujni;

Ko Espíritue ndo Dio juakoxin ixi ndo Jesucristo  
jian ndo.

Ko sen ángel bikon sen ndo

---

\* **3:16 xasintajni** mundo

ko kaxon nchijí nunte xasintajni kuin en ña nge e kuanichja ndo  
 ko kueya chujni jii ngata a nunte stetitikaon ña ndo.  
 Ko tjume e ndo Dio kuayé e ndo ndo Jesucristo ti jii ngajní.

## 4

### *Ni tsitikaon a ndo Dio*

<sup>1</sup> Ndachro Espíritue ndo Dio nchakon tsaxi tsjexin nunte xasintajni, kaxin sen kuitikaon ndo Dio tsachrjendáa sen ixi xrorué e sen espíritue xi ña i, xi ncheya, ko tsitikaon sen nge e tjako xi nche e xrée Xixron anxrée.

<sup>2</sup> Je e sen tsin en sen nge e ndachro chujni ncheya, chujni xraxaon a ndako, ni tosue a nche e ti ña i.

<sup>3</sup> Ko ni ji i tsituan an ña ixi tsute a sen ko sine a sen kain nge e ti ineni juinchéña Ndo Dio, ko ti juinchéña ndo Dio chao sine sen titikaon ndo ko chúxin chijni nduaxin, me e tsajon sen juasaya ngajin ndo.

<sup>4</sup> Ixi jian kain nge e juinchéña ndo Dio ko jua i xrondachrona je a jian; ko hora sinena xrokonda tsajonna juasaya ngajin ndo,

<sup>5</sup> ixi chijnie ndo ko ti nichje ena ndo, me e sinchenaonxin ndo kain nge e sintena.

### *Naa sen jian nche e xrée ndo Jesucristo*

<sup>6</sup> Ko siá ja in sinchekuen én sen kichuuna, me e ja a naa xi jian nche é xrée Ncháina Jesucristo, ko kain nchakon tangia chijnie Ncháina ko chuntia ngajin ndo.



<sup>7</sup> Titikaon a ngixeko chijni tseki a na ixi xro an xrée me e. Ja a titikáoan Ncháina ko ja a nche e nge e tjaun ndo Dio.

<sup>8</sup> Ko maski chujni tinga o ngixe i ejercicio nche e na ixi cuerpoena ixi jaña tingijna tsoné a na ko ícha tjintee ti tsitikaonni ndo Dio, ixi ji i tsingijna tsjachani jian tsake eni jai ko ti tsechónni kain nchakon.

<sup>9</sup> Chijni ji i, chijni nduaxin ko chijni ji i xrokonda tsayé e kain chujni.

<sup>10</sup> Méxin jaina nche ena xrée ndo Dio maski chinga ncheina chujni ixi titika onna ko stechon enna tsii ndo Dio, ndo jichón, ixi je e ndo nduaxin tsingijna ndo chujni ko jaina ícha ixi jaina titika onna ndo.

<sup>11</sup> Kain ji i tjakua ko tetuen én sen sinche e sen.

<sup>12</sup> Jian nche e ixi jaña tsjakua ngajin sen titikaon Ncháina Jesús. Ja a jian tsje e nge e nichja, ko chónde e sen juasaya,\* jian tsje e xranchi tjue e sen kichuua ko xranchi chuntia ndo Dio, xranchi jian tsajia. Ja in sinche e, me e tsjanoai a sen maski tsango chajan ja a.

<sup>13</sup> Ti xratjasa a jan an, ja a nichja chijnie ndo Dio ixi tsin en kain chujni ko nchexraxaoan sen kichuuna xranchi sinche e sen, ko nchekuen én sen chijnie ndo Dio.

<sup>14</sup> Nchetjáña ia juachaxin tjáa ndo Dio nchakon sen tetuan an ni ngo bake e itja sen ngata a jáa. Me e kuaye é ixi juachaxien ndo Dio.

<sup>15</sup> Jian nche é ixra ji i ixi jaña kain chujni xrot-sje e na ixi jian rirue é ndo Jesucristo.

---

\* **4:12 juasaya** respeto, honor

<sup>16</sup> Jian tsje e xranchi nche e ko ti nchekuen én sen kichuuna chijni nduaxin, jian titikáoan, ko siá jaña sinche é, me e tsarichuan kain nchakon ja a ko kaxon kain sen sinchekuen en.

## 5

### *Xranchi xronichje ena sen titikaon ndo Cristo*

<sup>1</sup> Chaxro nichje é sen tachríi; tuyakute a sen. Ko ti xrondache sen, nichje é sen xranchi xronichje é ndotáa. Ko kain chajan nichje é chán xranchi naa xjan kichuua.

<sup>2</sup> Sen nachríi nichje é sen kaxon xranchi xrokjui janáa. Ko nchrichajan, nichje é nchrichan xranchi nichje é naa nchrichan kichuua; kain sen, jian nichje e sen.

<sup>3</sup> Ko tingijna nchri ka an siá nduaxin xro an sen ndo a nchra chónnda nchra.

<sup>4</sup> Ko siá xrojan nchri ka an chónnda chjen en nchra o xjantié nchra, je e sen me e tikinixin en sen tsingijna sen nchra ko kaxon xrokonda tayakon en sen sen ndo a sen, janée sen o Ndotée sen, ixi kain ji i nche e ndo Dio juaxruxin.

<sup>5</sup> Sen nchri nduaxin ka an ko je o sen tsikitu e sen, ícha xrochuntia sen ndo Dio ko ícha tinóatée sen ngajin ndo ko nichje e sen ndo tiie, nchakon.

<sup>6</sup> Ko sen nchri, sen ka an, ndako a nche e, sen nchri me e xranchi tsiken en sen jii sen maski jichón sen.

<sup>7</sup> Tetuen én kain sen tsitikaon sen ti nchekuen en sen, ixi jaña xro an chujni xronichja ndako a ixi je e sen.

<sup>8</sup> Ko siá xrojan ngisen tsingijna i sen kichuu sen ko sen ndo a sen, sen me e tjako sen ixi nduaxin a

titikaon sen ndo Dio ko ícha ña i sen ixi ni chúxin a ndo Dio.

<sup>9</sup> Ko ti tsixintaxin xroon sen nchri, sen ka an, je o tsixintaxin sen chónnda ní ti ikán\* o ícha nano, ko je o tsixintaxin sen nchri kuachónnda naakua ndoxi e.

<sup>10</sup> Kaxon xrokonda tsichuxin na sen nchri, sen ka an ixi ndako nche e sen, xranchi tjaun ndo Dio: sen nchri ka an chaxro juinchekangi sen chjen en sen ko sen ka an jian nichje e sen kichuu sen ko jian kuiye e sen ni kuiji ndo e sen, ko jian bingijna sen sen titikaon ndo Cristo, ko bingijna sen ni ni e, ko kaxon bingijna sen ngajin ni chónnda juachjaon, ko juinche e sen kain ixra jian.

<sup>11</sup> Ko tasintaxin anta nchri, sen ka an, xranchrichájan, ixi ba sinche e sen juaxruxin tsute e sen íjngo ko tsintu e sen ti ndachro sen xrojuinche e sen ixra ngajin Ncháina Jesucristo.

<sup>12</sup> Kondeexin mee e tsama sen ijie ixi sinchejexin a sen ixra xrojuinche e sen ngajin Ncháina.

<sup>13</sup> Ko kaxon sen nchri, sen ka an, xranchrichájan chrjiko sen nchia ko nchia, ko se e sen ko je a je o me e; kaxon teki sen chijni konde a sen ko tajon ro a sen ko nichja sen chijni ndako a.

<sup>14</sup> Méxin tja on ixi sen nchri, sen ka an xranchrichájan cháña tsute e sen íjngo ko xrochónnda sen chjen en sen ko jian tayakon en sen ndo a sen. Ko jaña tsajon a sen juachaxin ngajin Xiña i ixi tsjangí e xa sen.

<sup>15</sup> Ixi kaxin sen nchri, sen ka an ó ngaxiton sen ko sterué e sen nge e tjaun Xiña i.

---

\* **5:9 ikán** veinte

16 Siá xrojan sen kichuuna, chónnda sen nchri ka an, xrokonda tayakon en sen sen ka an ixi jaña sen ni ngo ítsingijna i sen nchri ka an me e, ixi ícha jian tsingijna sen nchri ka an nduaxin xrokonde e.

17 Ko xronichjana jian ixi sen tituan an ni ngo ko xrokonda xroxenge e sen na ko ícha jian tson en ji i ngajin kain sen nchekuaína ko tjakoína chijnie ndo Dio.

18 \*Ixi chijnie ndo Dio ndachro: “Take anta ino ro a kuxinta nche e ixra”, ko kaxon ndachro: “Sen nche e ixra tikinixin en sen xroxenge e sen na.”

19 Tian a siá xrojan ngisen tjankata a ijie ngajin sen tetuan an ni ngo siá ko a yuu o ní sen xrochronga nge e nduaxin kon en.

20 Ko sen nduaxin chónnda ijie, nichje é sen ngataoxin ikon kain sen ni ngo ixi jaña sen ikaxin jian xroxraxaon sen ko ísinche a sen ti ndako a.

21 Tjanča a ngajin ikon ndo Dio ko Ncháina Jesucristo ko sen ángel kuinche e ndo ixi titikáoan kain ji i ko xraje o nche e ngajin kain chujni á chuxian sen o na i.

22 Ko tinche a jaña ngisen sinche e ixra ni ngo, ícha jian xrotsje e nge e tjakoxin sen, ba kaxon ja a tsama ijie xranchi je e sen. Ko ja a tsje e ixi xro an ijie tsama.

23 Ko ja a nanaó toni a ixi tíin tsée, ti a je o inda. Cháña ti ia nchíin xranvino.

24 Jíee kaxin chujni sa ó tonoxin ti xratóñe a na ijie. Ko jíee ikaxin sen ícha taka i tonoxin.

25 Jaña ton en kaxon kaxin chujni nche e ixra jian taka tonoxin, ko ikaxin maski jai tonoxin a, íjngo nchakon xrokonda tonoxin.

## 6

<sup>1</sup> Ko ngisen nche e ixra xrokonda tsitikaon sen ngajin ni xrée nche e sen, ko jaña xro an ngisen xronichjangíe nombrée ndo Dio ko xronichjangíe a na chijni nichjana, chijnie ndo Dio.

<sup>2</sup> Ko sen nche e ixra ngajin sen titikaon ndo Cristo, tsintue a sen tsitikaon sen ngajin sen kichuu sen. Ko ícha jian xrojuinche e sen ixra xro ó no e sen xro sen tajon ixra, je e sen naa sen titikaon Ncháina ko xrotjue e kichuu sen. Ja a nchekuen én sen kain ji i.

### *Ixi nge e titika onna tsake exinna juaxruxin*

<sup>3</sup> Siá xrojan na tjako na nge e ndako a ko take a na juaxruxin xro chijnie Ncháina Jesucristo ko kaxon nge e titika onna,

<sup>4</sup> ni me e je o nchejié aséen ko xro an nge e no e na. Nichjako na nge e ninta, ko ji i xranchi naa ichin xro ji i ti xin ti tochjio chujni ko te to na, ko ti nichjangíe e kichuu na ko ti tjue a kichuuna kaxon.

<sup>5</sup> Chujni jaña nche e chaxro a xraxaon na, kain nchakon te to na ko noe a na ti nduaxin. Xraxaon na xro ti tsitikaon na Ncháina jaña tsjacha na kueya tomi. Méxin tingaxintuan ngajin chujni jaña xraxaon.

<sup>6</sup> Ti titika onna Ncháina Jesucristo tsango tjintee, je o xro siá juaxruxin tsake xro xro je o nge e chondani.

<sup>7</sup> Xro nchakon jaina jongína, xro an nge e bikuuna xasintajni ko kaxon nchakon tsen en na, xro an nge e satsiku una.

<sup>8</sup> Méxin siá chondana nge e inena ko chondana manta stetsána xro xro me ó xrokujuna juaxruxin.

<sup>9</sup> Ko sen tjaun kueya nge e xrochónnda, jua i tsjacha sen tsatsinga sen nge e tangi, ko me e nchengachrue sen; ixi kueya nge e tjaun sen ko je a jian nge e xraxaon sen, ko me e tsi x̄in ti tsitjáñaxin sen.

<sup>10</sup> Ko ti ícha tjue eni tomi, me e nue e kain nge e ña i, ko xrojan sen xraxaon sen xrochónnda sen kueya tomi, me e nchengachrue sen ko titikaon a sen Ncháina\* Jesucristo, me e tangi tson en sen.

*Nge e kuetuan an ndo Pablo ngajin ndo Timoteo*

<sup>11</sup> Méxin ja a chujni nche e xrée ndo Dio, tintu é kain nge e ndako a ko rué e ti nduaxin ko ixi kain asáan xroxaxaon ndo Dio ko titikáon ndo ko tjue é ndo ko xrokonda ningakuen a chujni ko nchejié a asáan.

<sup>12</sup> Tetua ngajin kain nge e ña i ixi titika onna nge e jian ko ixi nchijií asáan titikáon Ncháina ko jaña tsjacha tsarichuan kain nchakon ixi ndo Dio kuiya a ndo ko jian juinche e nti i nge e kuetuan an ko kuitikaoan Ncháina Jesucristo ko kuin en ko bikon kueya chujni.

<sup>13</sup> \*Ngatoxin† ikon ndo Dio, ndo tajon juachaxin jichón kain nge e, ko ndo Jesucristo, ndo juako ngajin xi Poncio Pilato ixi titikaon ndo ndo Dio, tjanča a

<sup>14</sup> ixi tsitikaoan ko tatsían kain nge e kuetuan an ndo Dio ko tindoxin a nge e no a, ixi jaña xro an chujni tsjankata a ijié tsitjaja nchakon xrokjan Ncháina Jesucristo.

<sup>15</sup> Tsitjaja nchakon kuinche e ndo Dio, ndo chónnda juachaxin tetuan an, ndo Rey tetuen en

\* **6:10 Ncháina** Señor Ncháina Jesús o Ncháina Dio **6:13** Jn. 18:37.

† **6:13 Ngatoxin** delante de

kain ni rey ko Nchéé kain chujni, je e ndo sinche e ndo kain ji i.

<sup>16</sup> Je e ndo Dio nai a tsen en ndo ko ti jii ndo tsango tingasáña ko jua i tsonchjiñe e ninaa chujni ti jii ndo. Ko xro an ngisen bikon ndo ko jua i tsikon sen ndo. Je e ndo tayé e ndo kain juasaya ixi je e ndo chónḁa ndo kain juachaxin tetuan an ndo kain nchakon. Jaña tson en.

<sup>17</sup> Ko ni chónḁa kueya nge e nti i nunte xasintajni, ndache n̄a ixi sinchejié a aséen n̄a ko tetuen en n̄a ixi xrochúntia i n̄a nge e chónḁa n̄a ixi kain a nchakon xrochónḁa n̄a ti tjintee. Cháña tsitikaon n̄a ndo Dio, ndo jichón, ixi je e ndo tsajon ndo kain nge e ixi je e ndo tjaun ndo juaxruxin tsintee n̄a.

<sup>18</sup> Ndache n̄a sinche e n̄a ti jian ko tsingijna n̄a ngisen xro an nge e chónḁa ko tsonchjeya n̄a nge e chónḁa n̄a.

<sup>19</sup> Jaña xrochónḁa n̄a nge e tjintee jii ngajni ko tsjacha n̄a tsechón n̄a kain nchakon.

*Juexin kuetuan an ndo Pablo ngajin ndo Timoteo*

<sup>20</sup> Ja a Timoteo, tayakon en ixra tjáa ndo Dio ko tintu e ko tien a nge e nduaxin a nichja chujni. Ndachro n̄a ixi ícha no e n̄a ko tjinte a ti no e n̄a.

<sup>21</sup> Jaña xraxaon n̄a ixi noe a n̄a ko tjume e tsingachrue n̄a ko í chúntia a n̄a ngajin Ncháina Jesucristo. Ndo Dio sintanchaoan ndo. Jaña tson en.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f